



Publicaziuns dalla vischnaunca, jamna 16

Resultats dallas votaziuns communalas dils 14-4-2024

Diember dils votants: 1451
Participaziun alla votaziun: 63.3%

Credit da frs. 1'849'000.– per la sanaziun dalla Via Cons

Dau giu cedels:	915	
Cedels vits:	4	
Cedels nunvaleivels:	6	
Total cedels vits e nunvaleivels:	10	
Cedels valeivels:	905	
Gie:	292	(32%)
Na:	613	(68%)

Contract pil dretg da construcziun denter la vischnaunca e l'Ovra Solara Magriel SA

Dau giu cedels:	919	
Cedels vits:	5	
Cedels nunvaleivels:	6	
Total cedels vits e nunvaleivels:	11	
Cedels valeivels:	908	
Gie:	472	(52%)
Na:	436	(48%)

Dretg da recuors

Sebasond sin art. 37 dalla lescha communal da davart ils dretgs politics sa vegnir recurriu encunter las votaziuns communalas dils 14 d'avrel 2024 enteifer 3 dis dapi ch'il motiv da recuors ei vegnius constataus, sil pli tard denton il tierz di suenten la publicaziun uffiziala dils resultats. Il recuors ei d'inoltrar alla suprastanza communal.

Suprastanza communal

Cussegl da vischnaunca – Rapport dalla seduta dils 16 d'avrel 2024

Approbau il contract da concessiun d'aua per las Pendicularas Mustér SA

Mardis, ils 16 d'avrel 2024 ha giu liug el Center Fontauna la 31avla seduta dil cussegl da vischnaunca dalla perioda d'uffeci 2021/2024. El center dalla seduta ei stau la concessiun dil dretg dallas auas denter la vischnaunca e las Pendicularas Mustér SA. Il cussegl da vischnaunca ha approbau unanimamein il contract da concessiun. Plinavon ei la revisiun parziala dalla planisaziun locala concernent la zona dil spazi d'aua cun las zonas da prighel sco era dil plan general d'avertura Val Sogn Placi e Val da Cuoz vegnida approbada.

Sut l'egida dil **president dil cussegl da vischnaunca Ignaz Venzin** ei vegniu approbau mardis sera a caschun d'ina secunda lecziun unanimamein il contract da concessiun dil dretg da retrer aua (Wasserrechtsverleihung) denter la vischnaunca da Mustér e las Pendicularas Mustér SA. Cul contract da concessiun per l'utilisaziun dallas auas vegn concediu allas pendicularas il dretg da retrer aua ord ils uals Aua da Magriel e Val Acletta per la producziun tecnica da neiv cumbinai cun la pusseivladad da producir energia electrica. Per la producziun d'energia electrica duei vegnir installau ina turbina a Caischavedra avon il lag d'accumulaziun ed ina turbina a Funs/Sontga Catrina. La prestaziun dallas turbinas munta a strusch 1 MW. Tenor dretg vertent stuessen las Pendicularas Mustér buca indemnisar la vischnaunca per quei dretg. Ellas contractivas cun las pendicularas han ins sper ina taxa unica da concessiun da frs. 40'000.-- saviu contrahar in'indemnisaziun pauschala annuala sin basa dalla prestaziun e producziun d'entochen frs. 35'000.--. Per garantir il provediment da basa e per situaziuns extraordinarias, seigi quei en cass d'incendis ni auters cass da scartezia d'aua, san tenor contract da concessiun la corporaziun d'aua e tenor lescha cantunala la vischnaunca restrenscher la retratga d'aua. Plinavon ei ina realisaziun d'ina atgna ovra ella Val Acletta sin fundament d'ina expertisa buca pusseivel da realisar. Il motiv persuenten ei che la prestaziun annuala media brutta cun 0.86 MW contonscha buca il minimum d'in MW prestaziun. Per survegnir contribuziuns dalla confederaziun per l'investiziun d'ina tala ovra sto la prestaziun minimala esser 1 MW. La decisiun dil cussegl da vischnaunca vegn el senn dallas prescripziuns digl art. 32 lit. f dalla constituziun communal suttamessa prevedentamein ils 9 da zercladur 2024 alla votaziun all'urna.



Plinavon ha il cussegl da vischnaunca approbau unanimamein la revisiun parziala dalla planisaziun locala concernent la zona dil spazi d'aua cun las zonas da prighel sco era dil plan general d'avertura Val Sogn Placi e Val da Cuoz. Per buca retardar ils projects per l'avertura dalla meglieraziun funsila ella Val Segnas sco era digl Uaul Run eis ei necessari da definir ella Val da Cuoz sco era ella Val Sogn Placi las zonas dil spazi d'aua el rom d'ina revisiun parziala dalla planisaziun locala. El cass dallas zonas da prighel ei vegniu indicau el plan da zonas la zona da prighel sco quei ch'ella ei vegnida definida igl onn 2013 entras la cumissiun da prighel digl uffeci d'uaul e prighels dalla natira dil Grischun. Il perimeter dalla zona da prighel definius il 2013 ei ligionts pil plan da zonas. Cun quella revisiun vegn scaffiu las premissas planisatorias da projectar vinavon e silsunter realisar l'avertura Val Segnas ed Uaul Run. La decisiun dil cussegl da vischnaunca vegn el senn dallas prescripziuns digl art. 11 al. 1 dalla lescha da baghegiar suttamessa prevedentamein ils 9 da zercladur 2024 alla votaziun all'urna.

Suprastonza communal

Santeri Sogn Gions Mustér – Sclamada da fossas

Per saver realisar la fossa comunabla en santeri da Sogn Gions vegnan las fossas sisum santeri, las qualas il temps da ruaus ei spiraus, sclamadas. Tenor las prescripziuns digl art. 12 dalla lescha davart il satrar ed igl uorden da santeri dalla vischnaunca da Mustér munta il temps da ruaus per fossas 20 onns. Las suandontas fossas en santeri Sogn Gions vegnan sligadas:

- Agnes Herzog-Schuoler
- Cecilia Desax
- Hedwig Lutz
- Ida Lechmann-Pedretti

Nus supplichein ils vegnentsunter resp. talas personas ch'ei responsablas per las fossas d'allontanar cruschs, monuments e fluras entochen ils **26 d'avrel 2024** ni d'informar igl uffeci infrastruttura co igl ei da proceder. Las ramas dallas fossas vegnan demontadas entras la vischnaunca, medemamein tuttas cruschs e monuments ch'ei buca vegni allontanai entochen ils 27 d'avrel 2024.

Nus supplichein Vus da prender enconuschientscha ed engraziein gia ordavon per Vossa collaboraziun e Vossa capientscha.

Uffeci infrastruttura e baghegiar Disentis/Mustér

Tagl da lenna – serrada dalla via Plaun Menisch

Muort lavurs da transport da lenna cun suga vegn la via da Plaun Menisch ad esser serrada pil traffic motorisau sco era pil traffic plaun. Las lavurs han prevedentamein liug el decuors dallas proximas 3-4 jamnas. Pertuccau ei il tschancun da Plaunca Su – Pardi sco era Fontanettas – Plaun Menisch. Per damondas urgentas eis ei da contactar il selvicultur Simon Cathomen, Telefon; 081 920 36 41.

Bien engraziament per l'enconuschientscha e capientscha.

Uffeci forestal Disentis/Mustér

Controla da habitonts

Mortori

Rita Lutz-Castelberg, naschida ils 16 d'october 1936, morta ils 11 d'avrel 2024

Administraziun communal Disentis/Mustér



Rimnada da pupi

Venderdis, ils 19-4-2024

Preziadas convischinas, preziai convischins. La rimnada da pupi digl avrel ha liug sco usitau. Adatg! Ei vegn mo rimnau: gasettas, illustradas, catalogs, cudischs e prospects stampai.

Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziel.

Nus rimnein **buca cartun**. Quel sa vegnir deponius a Raveras igl entir onn ora e buca duront la rimnada.

Bien engraziament per Vies agid e sustegn!

Nossa Scola populara Mustér, Ch. Berger

Evang.-Reformierte Kirchgemeinde Cadi

ADATG: il termin diils 27 d'avrel vegn stuschaus!

NIEV: Suentermiezdi da cant cun Regina Wilms, sonda, ils 11 da matg 2024 allas 14.00-17.00 el Center Aua Viva, Via Raveras 25, Disentis/Mustér

ACHTUNG: der Termin vom 27. April 2024 wird auf Mai 2024 verschoben! **NEU: Singnachmittag mit Regina Wilms, Samstag, 11. Mai 2024** von 14–17 Uhr im Begegnungszentrum Aua Viva, Via Raveras 25, Disentis/Mustér

Uniun da dunnas Disentis/Mustér

Informaziun radunonza generala

A caschun dalla davosa radunonza generala ein las sequentas personas vegnida elegidas;

Aurelia Flepp, suprastonza [elegida per dus onns]

Ursina Huonder, suprastonza (elegida per dus onns)

Plinavon ha la radunonza fixau la contribuziun annuala a frs. 20.00. L'unfrenda da sontga Lisabet ei voluntaria. Il protocol dalla radunonza generala ei sin la pagina d'internet www.uddm.ch/Suprastonza

Cordials salids
La suprastonza

Informationen Generalversammlung

Im Zusammenhang mit der letzten Generalversammlung der Uniun da dunnas sind die folgenden Personen gewählt worden:

Aurelia Albin, Vorstand [gewählt für 2 Jahre]

Ursina Huonder, Vorstand [gewählt für 2 Jahre]

Weiter wurde an der Generalversammlung der Mitgliederbeitrag auf CHF 20.00 fixiert. Die Spende für die Heilige Lisabet ist Freiwillig. Das Protokoll der Generalversammlung ist auf www.uddm.ch/Suprastonza aufgeschaltet.

Liebe Grüsse
Der Vorstand



Bezirksviehausstellung Trun

20.4.2024, Pustget, Trun

Siehe unter Trun!
